

DI PIACHI PA CURIOSO

...Flora di Aruba como medio curativo...

For di inicio, e raza humano tabata preocupa cu malesa cu e no por a comprende.

El a cuminza haci sacrificionan na e Diosnan cu e tabata kere por a yude y cu e tabata teme, y despues a haci e dicho Dios ta yuda es cu yuda su mes, su filosofia.

Asina medicina local a nace atravez di purba y faya.

Flora di Aruba a fungi como medio curativo a travez di historia.

Asina Indiannan tabata conoce Piachi, e homber di medicina cu tabata fungi como dokter.

Despues e Curioso a haci su entrada y te awe conoce curanderonan cu ta practica den pueblo.

E personanan aki no a haya preparacion medi-

co y ta uza yerba, mata, raiz y blachi di palonan.

Tabata tin cierto mata hopi uza como por ehempel Brusca (cassia occidentalis).

E blachinan di e mata tabata ser prepara manera thee contra di bichi.

Pa baha keintura, tabata pone e mata ariba cama of hamaca y e paciente tabata drumi ariba e mata. Promer cu drumi, tabata bebe e thee pa asina haya un efecto doble.

De vez en cuando tabata cubri e pianan cu e blachinan.

Brusca tabata yuda tambe den caso di dolor pisa di cabez y gripe. Na e momentonan ey tabata tosta e semiya, mul' e y bruhe cu cofi.

Awe ainda ta usa



Brusca na Aruba.

Anglo of Wanglo (Tri-
bulus Cistoides ta otro
mata curativo.

E raiz di e mata ta ser
laba siete biaha cu awa
limpi, y corta den pida
pa ser herbe.

E bibida ta ser duna na
mucha. Ta pone sucu pa
asina kita e sabor amargo.

E ta ser especialmente
uza pa muchanan cu ta
saca diente pa kita male-
star y keintura cu ta acom-
paña e suceso aki.

Betonica tambe ta un
yerba contra keintura.
Pero e ta especialmente
bon pa grawatamento.

E blachinan y takinan,
laba siete biaha, por sirbi
como baño. Tambe por
bebe e likido pa un efecto
doble.

Den nos edicion di
otro siman, nos lo sigui
elabora ariba e matanan
cu ta ser uza como medio
curativo.